



歙縣志卷十

人物志

士林

按舊志於文苑外別標士林以敦行勵學各有所就非文苑所能該也今仍之

宋吳雲龍字叔霖器局夷曠篤好程朱之學屢中鄉選任本縣學教諭以詩名於時

吳自牧字益謙溪南人嘗膺鄉薦三上春官不利退而講究問辨自信其所得作講義史評雜著數百篇弟自中字益欽亦以鄉薦爲福州教授教人有方師範端肅

元程一飛字翀甫博集諸經尤精於詩教授天台郡守林洽延置郡

齋就問政體隨事據理以對早孤事祖母孝祖母晚得末疾朝夕侍澣濯必身親之後專以經學訓誨鄉閭子弟負笈來自遠方所居至不能容

程大年槐塘人博通經史郡城兩被寇大年爲總管府決籌畫策城賴以全辟爲紫陽書院山長

明吳海字朝宗豐南人僑居閩縣元季以學行稱值四方盜起絕意仕進洪武初守臣欲薦諸朝力辭免旣而徵諸史局復力辭嘗言異端爲聖道之賊申韓爲治道之賊稗乘爲正史之賊艷詞爲文章之賊上之人宜敕通經大臣會諸儒定其品目頒之天下民間非此不得輒藏坊市不得輒鬻令學者不涉異聞因著書一編曰

書禍以發明之與永福王翰善翰嘗仕元海數勸之死翰果自裁
海教養其子偁卒底成立平居虛懷樂善有規過者欣然立改顏
其齋曰聞過爲文嚴整典雅後學咸宗仰之有聞過齋集明史有
傳

凌慶四字必通沙溪人從胡雲峯游學成歸里構數楹于村南八
畝丘曰北園日聚徒闡明程朱之旨不樂仕進學者稱北園先生
鄭師山唐白雲皆折節與交明太祖過歛以耆儒召對稱旨賜尊
酒束帛著有濟時三策正心論北園小草郡守陳彥回爲立傳

唐世典字崇克郡學生時有顯者欲於郡學宮牆穿一私門自便
世典力爭之得不果乃譖之督學檄赴淮安試百鳥表立就學使

奇之著有春秋講意

方信字好古靈山人太學生嗜書博覽嘗補西漢書許永傳不失班門法著新安志補考訂精密直筆不阿爲時所稱

吳遜字以恭郡城人精易理研心性之學善詩文著有可筠藁曾孫熙講學斗山爲王龍溪所器重

汪茂德字士元潛口人萬歷己酉舉人著有節烈遺事幽貞賴以不朽友諸弟撫諸姪邑人稱之

柰受豐巖鎮人幼聰敏讀書十行俱下著有篤志集

趙驥昌字世隆清苦好學以文行著宏治元年舉修憲廟實錄每歲郡行鄉飲皆賓禮之

程暉字孟陽臨河人弱冠補郡庠生篤於孝友居喪哀毀不勝著作甚富其言一稟六經著有讀禮表微程氏繩武集

張廷材字德卿紹村人補弟子員善訓迪遊其門者咸就規矩聞呂仲木講道金陵徒步往從絕意進取以講習爲事從湛原明得二業合一之訓學者稱夷白先生

胡馨桂字大本天順間隱居講學性行溫良郡守延爲文社長著有存性齋集燕居漫藁諸書

余棐巖鎮人事父克養志兄弟五人終身無間生產盡付諸兄弟己獨受徒養親著有易經本旨歷代諸臣傳贊諸書

黃懋字孟晉侍御應坤長子以諸生入成均遇親友之貧者必力

爲周恤有饘粥田數畝弟爲鬻之家人言於懋懋曰諾已而家人復言懋曰已知可推稅與彼受者姪咸象字像之亦工詩

李英字子和槐塘人邑諸生嘗讀書濡須口謁比部解友人之難說軍帥禁苗兵之擾試南畿適倭警城閉應試千人望門錯愕英大聲呼司城與語司城悟啓鑰令英殿千人入都人士蹕之從弟仲明字德遠亦邑諸生務在躬行貧而能樂士人稱之

江應曉字覺卿郡城人任涪州判著有對問編囂囂集

黃原泰字立山虬村人受易於朱楓林洪武初以明經舉授宛平教諭著有尙書講義教賴園集

吳元滿字敬甫生而獨日常曰吾以一目外觀而以一目內照覺

內之所得者較多因廣貯書力探六書意義點畫音韻矻矻幾五十年學始成東走吳證於趙凡夫西走楚證於朱宗良二人並許之惟云音聲一部少有未協則以方言不同之故元滿方欲加究暴病歿著有六書正義六書總要六書泝原諧聲指南切韻樞紐等書

程孟字文實槐塘人誠樸力學著有槐濱集又爲程氏會通譜五十卷外譜二卷世忠事實源流十卷明良慶會錄三卷族子子敬字和一凡先世文翰及諸經史悉有節略嘗編事文摘子一集題所居曰敬所

方大治字在宥巖鎮人祖父累世積書至大治藏貯益富博覽精

研悉以丹鉛甲乙興至時爲韻語大治行誼最多而力持王父減貲孽子一事則尤其卓卓者

畢應辰字嵩陽郡廩生有雋望工古文詞著有嵩陽集

孫麟字道徵邑諸生外樸訥而內醇和溫然長者工於說詩門下弟子甚多僅及貢而歿

鄭燭字景明補郡弟子員貢入成均遊鄒東郭湛甘泉之門嘗敝衣糲食或有撫先輩遺行質於燭者燭徐曰一何論及此但學其善者足矣選授河間府通判籌餉密雲革耗稅嚴出納軍民稱便改辰州官政如故暇則進諸生講學析疑卒祀鄉賢子懋竣字文升邑諸生有盛名屢試於鄉不售退從諸先生遊倡六邑文會講

明心性至死不亂士論賢之

程嗣光字汝學邑諸生通五經尤精詩易從鄒東郭王龍溪得聞王文成之學非法不言不行晚貢授青陽訓導

呂海字觀之邑諸生究心性之旨湛甘泉王龍溪洪覺山淩斗城講學斗山每多質問爲一時領袖

吳林字用茂庠生師事湛甘泉耿楚侗錢緒山潛心良知之學與兄樓廬墓三年未嘗入私室

程子說字仲傳號中岡少承父觀察學受業黃澄湖王午山之門遂窺濂洛之旨舉萬歷癸酉鄉試有以苞苴造者輒掉頭不顧惟日陳古鼎名書卻立危坐年四十終

程宏忠字汝一槐塘人師事泰州王心齋明格物致知之旨復往從王龍溪羅近溪耿楚侗胡廬山以就正焉後遊衡嶽曾植齋延之書院數年晚自衡之粵謁陳白沙湛甘泉墓遂卒湘漢衡陽人士繪像祀於石鼓書院

余育字養浩父存修喜遊育隨侍不離于側或奉命他往雖數千里必致名花異卉以娛親心父歿孺慕終身又嘗置義塾教族子弟之無師者著有潛虬山人集十卷

洪瑜字忠卿郡庠生淹貫經史所居植梅數株講學其中人稱梅軒先生嘉靖乙卯邑令史公創建新城瑜獨營數雉

洪啓蒙字有本桂林人郡諸生潛心陽明之學恍然有遂屏卮得

辭默存解悟凡所論說大都發東越微旨而不詭於考亭耿楚侗負理學重名督學南畿得其試策亟賞之謂直探理窟不墮言詮士林罕見其匹因引登白嶽揚推聖賢大旨自是解悟益深講業紫陽書院學者稱源泉先生

洪天開字陝夢崇禎丙子舉人嘗讀歷書不漏一字有問字者至命掌書僕取架上書篇帙次第從不失一號爲書廚官吳江教諭旋知永定縣事

王獻蓋字德忠嚴鎮人博覽墳典尤研心于三傳著爲論說於經多所發明居常下帳授徒及聞呂仲木講學留都特往師之其學以躬行爲先以經世匡時爲己任未及施行而卒

方以蒙汪無競並任子以蒙厚重稱長者時以擬之陳仲弓無競著述自娛而年不永李本寧太史銘其墓曰以孝成悌以悌成慈善歸於親而名不尸以悌成讓以讓成廉貧歸於子而子無嫌蓋實錄也二人胥恬退自約屏斥貴胄習氣足以風世勵俗

畢練字純中邑諸生家貧下帷負郭丹鉛自喜尋棄帖括學卜筮六連湖上課農垂釣不復他事唯取生平所讀詩史隨摘二三奇怪事鱗次成帙題曰彙雋族子懋謙性亦近之並以詩名

方如騏字士雄邑庠生父母歿廬墓讀書踰年遍通經史湖南葛寅亮一見其文奇之聞東越周道登倡學東南官於滁執贄往見一再語周大驚因出所著東越傳宗諸書屬如騏序居金陵瘞南

門燼骨凡數千與鄭滂石螯金陵孔道以達蕪湖費五千緡偕弟如驤相友愛如驤亦勇於爲善能佐助如騏

楊貞一字孟公郡諸生姿性穎妙講易及莊老吐屬有晉人風事親色養終身如一日博士三上其優行於學使者著有詩音辨略字母詮略

凌立字爾三號衣白山人沙溪人事繼母曲盡孝養甘貧自樂酷嗜書史或解衣易之卽突無煙亦不顧也著有六經流別國朝典故孝經大義讀史歌略疑同集剖疑錄異字鏡自怡別錄華影集臥遊錄夢覺篇煮字齋集

羅人望字當世號虛舟中丞應鶴子凡國家典制及古今名臣言

行經濟靡不殫悉

程思聰字謀伯號鈍菴托山人幼英敏好讀書不屑章句少遊邑庠日與其徒闡明大學中庸之旨年既老從遊者益衆講學不輟有未解必多方開導之著述甚富

汪孝字伯友食貧嗜學好吟咏名士爭相交昵著有飛霞閣集

何鍊字以百幼以春秋冠多士著有春秋通解又嘗考證諸書綴兆名器成樂律一書以補六經之缺邑今彭好古旌其門曰聖世逸民

黃祚字維承號蛟峯潭渡人從商文毅受尚書尤邃於理學著有史鑑會要通鑑外紀性理便覽讀易鈔春秋傳略四書備忘錄蛟

峯文集等書

畢珊字文潤號友梅自幼穎異長通毛詩補邑庠生正德間聞王陽明講學南都徒步往受業久之有得告歸陽明贈詩云紫陽山下多豪俊應有吟風弄月人讀書窮理訓子弟率之以身至老不怠

戴驥昌字世隆清苦好學以文行著宏治元年舉修憲廟實錄每歲郡行鄉飲皆賓禮之爲鄉先達所重

許師古字去疾初名景字季明文穆公姪工詩賦嘗爲諸生投筆走司馬門錄塞上功至行都司僉書守備浯嶼擒賊百餘入徙鎮中平負才不得志縱酒以死汪道昆贈時亟稱之

吳守紀字邦正豐南人居廣陵著有古今日食祥異錄兵略時務閒中雜記補注性理洪範等書佐吳喻皋幕言聽計從殲禽倭寇大司馬李光齋都憲劉百川唐荊州並以參謀禮之晚與廣陵九老結鷗亭之會詠歌適志

吳國廷一名廷字用卿豐南人博古善書藏晉唐名蹟甚富董其昌陳繼儒來游俱主其家嘗以米南宮真跡與其昌其昌作跋所謂吳太學書畫船爲之減色然尙藏有右軍官奴帖真本者也刻餘清齋帖楊名時爲雙鉤入石至今人珍襲之謂不減于快雪鬱岡諸類帖所刻有館本王右軍十七帖唐人雙鉤本宋濂跋鴨頭帖宋紹興御題胡母帖行穰帖思想帖趙孟頫文徵明等跋遲汝